



## নতুন সরকারের সঙ্গে ঘনিষ্ঠ সহযোগিতা চায় ভারত: প্রণয় ভার্মা



ভারতীয় হাইকমিশনার প্রণয় ভার্মা। ছবি: সংগৃহীত

বাংলাদেশে নতুন সরকার দায়িত্ব নেওয়ার পর কূটনৈতিক তৎপরতা জোরদার করেছে ভারত। এ প্রেক্ষাপটে ঢাকায় নিযুক্ত ভারতের হাইকমিশনার প্রণয় ভার্মা পররাষ্ট্রমন্ত্রী ও প্রতিমন্ত্রীর সঙ্গে সৌজন্য সাক্ষাৎ করেন। বৈঠক শেষে তিনি জানান, দুই দেশের দীর্ঘদিনের ঐতিহাসিক ও বহুমাত্রিক সম্পর্কে আরও গভীর ও কার্যকর পর্যায়ে নিতে আগ্রহী নয়াদিল্লি।

তিনি বলেন, নতুন সরকার গঠনের পর এটি ছিল পররাষ্ট্রমন্ত্রীর সঙ্গে তার প্রথম আনুষ্ঠানিক বৈঠক। আলোচনায় পারস্পরিক স্বার্থসংশ্লিষ্ট নানা ইস্যু উঠে আসে এবং ভবিষ্যৎ সহযোগিতার দিকনির্দেশনা নিয়ে প্রাথমিক মতবিনিময় হয়।

সাম্প্রতিক কূটনৈতিক যোগাযোগের কথা উল্লেখ করে প্রণয় ভার্মা জানান, নির্বাচনের পরপরই ভারতের প্রধানমন্ত্রী নরেন্দ্র মোদি বাংলাদেশের প্রধানমন্ত্রী তারেক রহমান-কে অভিনন্দন জানান এবং টেলিফোনে কথা বলেন। পরবর্তীতে শপথ অনুষ্ঠানে ভারতের প্রতিনিধিত্ব করেন লোকসভার স্পিকার ওম বিড়লা। তিনি ভারতের প্রধানমন্ত্রীর একটি বিশেষ বার্তাও হস্তান্তর করেন।

বৈঠকে ভারত সরকারের অবস্থান তুলে ধরে হাইকমিশনার বলেন, একটি গণতান্ত্রিক, অগ্রসর ও অন্তর্ভুক্তিমূলক বাংলাদেশ গঠনের প্রচেষ্টায় ভারত সহযোগী থাকতে চায়। ইতিবাচক ও গঠনমূলক দৃষ্টিভঙ্গিতে নতুন সরকারের সঙ্গে কাজ করার প্রত্যাশা ব্যক্ত করে তিনি জানান, পারস্পরিক স্বার্থ ও আস্থার ভিত্তিতেই সম্পর্কে এগিয়ে নেওয়া হবে।

ভিসা প্রক্রিয়া সহজীকরণ এবং জনগণের মধ্যে যোগাযোগ বাড়ানোর বিষয়েও গুরুত্ব আরোপ করেন তিনি। তার ভাষ্য, জনকেন্দ্রিক সহযোগিতা বাড়াতে দুই দেশই বাস্তবসম্মত ও দূরদর্শী উদ্যোগ নিতে পারে।

সবশেষে তিনি আশাবাদ ব্যক্ত করেন, পারস্পরিক সম্মান ও সহযোগিতার ভিত্তিতে বাংলাদেশ-ভারত সম্পর্ক ভবিষ্যতে আরও দৃঢ় হবে এবং উভয় দেশ যৌথভাবে উন্নয়নের পথে অগ্রসর হবে।